

En pia memoria da

22. 3. 1977 nr. 23

Onna Maria Monn-Berther ed Onna Catrina Monn-Venzin, Rueras



Onna Maria Monn



Onna Catrina Monn

Entschewend orasism il vitg da Rueras, ha igl aunghel dalla mort fatg igl atun vargau snavur all'entira populaziun dil vitg. Ina mumma, Elisabet Berther-Deplaz, in bab e bien amit Toni Berther-Schmid e treis giuvens els megliers onns han stuiu trer leu lur armas da lavour e suandar quella che ha cumpassiu ni cun giuven ni vegl. Ils treis giuvens ein: Vigeli Riedi, n. 1950, Giachen Giusep Deplazes, 1943, e Paul Loretz n. 1926. — Seconsolond cun ils plaids: «Cun la mort vegn la veta buca prida, mobein midada» giavischein als cars defuncts il rauas perpeten.

Laschond allura ca. quater meins rauas a nus vischins, splunta la mort danovamein amiez il vitg. Ils 13 da fevrer annunzia il zenn grond da s. Giachen la mort dad Onna Catrina Monn-Venzin e treis jamnas pli tard dad Onna Maria Monn-Berther. Vividas sco quinadas en la medema casa, rauassan ellas ussa ual ina sper l'autra sin santeri. Ellas drovan buca far leu pasch ina cun l'autra, pertgei sco la Catrina hagi detg, hagien ellas mai giu da parter in plaid ina cun l'autra. Quei ei in attest che exprima clar e bein il caracter dallas duas defunctas e che duei valer era a scadin da nus sco bien exempl.

Onna Maria Monn-Berther ei naschida igl onn 1896 a Rueras. Ses geniturs: Gion Fidel e Maria Ursula Berther, naschida Hendry, ein — malgrad temps critics e per part fetg maghers — sestentai ed han tratg si la respectabla famiglia da 10 affons, dils quals vivan aunc oz: rev. pader Vigeli Berther, a Mustér, sora Maria Ursula Berther, a Baldegg, Maria Ursula Walder-Berther, a Surcuolm, e Francesctg Berther-Venzin, a Rueras.

Igl onn 1924 marida Onna Maria cun il giuven Giachen Antoni Monn. Ord quella ventireivla lètg neschan 4 affons: duas feglias e dus fegls. La legria dils geniturs fuva gronda e la veta da famiglia exemplarica. Bein per ina gronda grazia, denton era cun sentiments d'encarschadetgna, han els priu d'astgar surdar la feglia veglia sco sora alla claustra da Müstair. Denton, sco l'aura semida aschia ha era tuttenina la legria stuiu far plaz alla crusch. In bi di da stad digl onn 1936 vegn la tresta nova, che siu fegli Gion Giachen, che fageva il pastur en la Val Milar, seigi sedisgraziaus. Mo sco bara han ins purtau el a casa. Grazia alla ferma cardientscha sesuttametan els era a quella greva frida. Biabein 20 onns pli tard, ils 4 da mars 1958, viseta la mort danovamein la famiglia Monn-Berther e raffa il consort e bab nunspetgadamein ord siu miez. Ei

tucca ussa alla buna mumma — en uniun cun siu fegl Giusep — da purtar quitaus e fastedis senza il bab da casa. Endisada denton da lurror ed enconuschenta sco buna cusunza, ha la buna Onna Maria continuau sia veta, sefidond sin Diu e cun far bia dil bien als concarstgauns.

Ina nauscha malsogna ha surpriu ella dapi ils davos meins. Quella ha ella surportau cun admirabla pazientzia entochen la mort. La dumengia dils 13 da mars ha in grond til da bara accumpaignau la defuncta alla fossa ed aschia documentau la simpatia ch'ella ha adina gudiu. Ella rauassi en pasch!

Onna Catrina Monn-Venzin ei naschida igl onn 1902 sco feglia da Paul Giusep e Maria Margreta Venzin-Peder a Rueras. En uniun cun ils auters 5 fargliuns, dils quals mo la Maria Ursula Venzin viva aunc oz, ha Catrina passentau sia giuventetgna. Dira sort ha tuccau il bab Paul e ses 6 affons, cura che la mumma ha stuiu bandunar la veta terrestre e schar anavos affons aunc pigns. Onna Catrina ha lu giu la missiun da remplazzar la mumma gia en ses giuvens onns e d'haver quitaus per il bab ed ils fargliuns pli giuvens. Aschia ei sia veta giuvenila stada mudergiada da quitaus, quei che mo tgi che ha giu la medema sort senta.

Igl onn 1926 damonda il giuven Placi Monn ella sco spusa ed els siaran la lètg. Ferton ch'il Placi fageva il marcadont e pur, sefatschentava la Catrina sco mumma da casa. La lètg ei stada benedida cun 7 affons: 3 feglias e 4 fegls. Dallas feglias ei ina, oz sora Vigelia, ida en claustra a Glion e lavura momentan en igl asil da vegls a Trun. Ils auters han ussa per part sez fundau famiglia. Ina greva frida ha tuccau la defuncta e ses affons il december 1970, cura ch'il mariu e bab ei vegnius clamaus alla veta perpetna.

La Catrina, gia sils onns, cu siu mariu ei morts, ei lu serertratga egl asil da s. Vigeli a Sedrun. Probabel il schar encrescher per ils ses e per la casa, nua ch'ella ha tratg si sia famiglia, ha buca schau leu rauas ad ella. Suenter buca ditg eis ella turnada a Rueras e vivida persula, gudend denton tut quitaus davart dils ses ch'ein leu da maneivel. — Suenter cuorta maldispostadad e nunspitgadamein banduna era quella buna mumma ils ses per render si'olma al scaffider.

Nuslein seregurdar vinauv da tuts nos cars defuncts e giavischar ad els il rauas perpeten. Allas famiglias en malencurada, admettein nus nostra sincera condolentscha.

Gion Chr. Caduff